



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**46. Kalenderwoche – ab 9. November 2008**

## Brosd Wahlzeid!

Nu is widdorma Brähmjähre gewähsn! Bei uns in dor Gabaredd-Gisde! Im Hedwischhof! Ach, Sie hamm das noch gahr nisch gewussd? Na, scheen - jedzde dun Ses wissn. Un isch muss Ihnen sachn, es is so viel schiefgegang - de Leide hamm sisch scheggisch gelachd!

Wobei, was heeßd schiefgegang - eischendlich is nischd schiefgegang, es hamm sisch bloß unvormuhdede Ereischnisse ergähm. Un immor, wenn irschendwas unvormuhded offdauchn dud, un de Ginsdlor sinn selbor iborraschd dadervon, dann hamm die im Bublignum dähn greeßdn Schbaß. Wenn alles wie geblahnd loofn dud... naja, das is dann irschendwie langweilisch! Nee, es darf schon bißl was bassiern, was nisch geblahnd is. Jednfalls bei uns. Weil mir improvisiern kenn!

Das mid dähm Improvisieren, das hamm mir ja damals in dor Ehemalischn gelernd. Dazumals hadds ja ooch immor een Blahn gegähm, abor dann mussdesde sähr geschiggd sein, weil ehm dor Blahn nisch mid dor Werglichkeed iboreingeschdimmd had. Da mussdesde improvisieren! Du mussdesd de Engbässe reschdzeitisch erkenn und blidzschnell handeln, damid de nisch in de Rehre geguggd hasd. Un wensde das kannsd, das Improvisiern, dann is das ehm ooch heidzudaache nisch von Schadn. Ooch außorhalb von dor Blahnwerdschafd dud nisch alles wie geblahnd loofn. Wenn isch ma bloß an die Banken erinnorn darf, die sisch iborfressn haddn un nu am Bladzn sinn!

Abor ehm ooch off dor Biehne is Improvisadsjohn ginsdisch.

Ma nehmbei - Margdwerdschafd ohne Gorrubsjohn - das is wie Blahnwerdschafd ohne Engbässe!  
Un Gabaredd ohne Banne - das is wie de Forml Eens ohne een ordendlichn Gresch!

Ja, was glohm sie, warum de Leide sisch so gerne die Audorenn anguggn dun? Weils ehm ab un zu

ma Blaudzn dud! Ohne Unfälle däde das kee Schwein indressiern, wenn die Audos ihre Rundn drehn. Ooch beim Fußball - was däde dor Fußball ohne Faults sein? Besondorsch, wenns dähn Geschnor dreffn dud!

Nu is bloß eens bleede - wenn bei uns off dor Biehne was danähm gehn dud, wose alle ihre helle Freide dran hamm, dann dun mir nadihrlisch vorsuchn, die scheene Banne ooch beim näschdn Ma geblahnd einzubaun. Damid ooch das nächsde Publigum sein Schbaß hamm dud. Abor das glabbd meisdens nisch! Nee, geblahnde Bannen dun irschendwie nisch fungdsjoniern! Irschendwie had dor Mänsch, wennor Publigum is, eene Andenne daderfier endwiggeld, was werglisch eene eschde Banne is un was bloß Schoh is. Das is genauso, wie wennsde in dor Margdwerdschafd kinsdlische Engbässe hährschedeln willsd! Zum Beischbiel - um de Kooflusd anzuräschn! Das glabbd nisch. Engbässe missn ooch eschd sein, damidse de Kooflusd anreschn kenn! Das Jachdfiebor sozusachn!

Abor isch kann Ihnen vorschbreschn - also, was uns in dor Gabaredd-Gisde bedreffn dud - bei uns dud eischendlich immor - nisch bloß bei dor Brähmjähre - e bißl was danähm loofn. Daderfiehrr kann isch werglisch de volle Geld-zurigg-Garandie ibornemm!

**Eduard Sachsenmeyer**